


TEZAUUR LITURGIC

15 OCTOMBRIE

**SLUJBA
SOBORULUI
SF.NOI MUCENICI
ȘI MĂRTURISITORI
AI
BIELORUSIEI**



**MINEIUL PE OCTOMBRIE
MOSCOVA**



Месяца октября в 15-день Служба собора новомучеников и исповедников земли Белорусския

На велицей вечерни

На Господи, воззвах: стихиры, глас 4:

Священномученицы земли Белорусския,/ яко пастырие добрии,/ мудре словесныя овцы окормляли есте,/ веру Православную утверждающе,/ нищия одевающе и алчущия питающе,/ страждущия врачующе и закон любви Божия соблюдающе./ Сего ради молим вы:/ молитесь Христа Бога,/ да спасет души наша.

Священномученицы земли Белорусския,/ Пастыреначальнику Христу последующе,/ веру истинную, яко щит, сохранили есте/ и, с любовию ближним послуживше,/ даже да крове пострадали есте./ Темже и неувядаемый венец бессмертия обрели есте/ и ныне молитесь Господа/ о спасении душ наших.

Новомученицы и исповедницы земли Белорусския,/ предстояще престолу Святыя Троицы,/ присно молитесь за нас, на земли сущих,/ да ревностно храним заповеди Божия,/

и явим терпение во всех обстояниях,/ и любовь
нелицемерную обрящем,/ и спасем души наша.

Слава, глас 5:

Всевышний Владыко,/ в Троице славимый и
поклоняемый,/ ущедри ны благоприятными
мольбами/ священномученик Твоих,/ пред
мучители дерзновенно исповедавших Тя,/
Единого истинного Бога,/ и Твое, Сыне Божий,/
неизреченное от Матере Девы/ спасительное
воплощение.

И ныне, Богородичен, глас тойже.

Таже прокимен дне. И чтения 3
мученическая.

На литии стихира храма и святых, глас 6:

Исповедницы веры и священномученицы
страны нашея,/ кровьюми вашими землю
обagriли есте,/ ныне же, предстояще Престолу
Божью,/ присно молитесь Господа спастися
душам нашим.

Слава, и ныне, Богородичен.

На стиховне стихиры, глас 5:

Страстотерпцы славнии,/ веру
Православную добре сохранившие,/ в мучениях,
бедах и напастех,/ яко столпы незыблемии,
пребысте/ и образ благочестия верным

преподасте./ Темже и нам помозите/ веру непоколебиму соблюсти/ и спасти души наша.

Стих: Священницы Твои облакутся в правду/
и преподобнии Твои возрадуются.

Имуще вас, новомученицы доблии,/ теплыя ходатаи ко Господу/ и твердыя поборники веры Православныя,/ молим вас мы, недостойнии,/ жизнь нашу умирить,/ терпение и любовь к ближним даровати/ и спастися душам нашим.

Стих: Воспойте Господеви песнь нову/
воспойте Господеви вся земля.

Новомученицы Белорусстии,/ кровию вашею веру Христову запечатлевшии,/ Владыку всех молите/ Церковь Русскую в Православии утвердить,/ землю нашу от скверн очистить,/ люди во благочестии сохранить/ и спастися душам нашим.

Слава и ныне, Богородичен.

Тропарь, глас 4:

Святии новомученицы земли Белорусския,/ благочестия светильницы и жития евангельскаго образи,/ заточения, изгнания и горькия работы мужественне претерпевшии/ и Христа ради даже до крове пострадавшии,/ Егоже, яко Начальника мира и спасения Совершителя,/ усердно ныне молите/ помиловати души наша.

На утрени

На Бог Господь: тропарь тойже, дважды.
Слава, и ныне, Богородичен воскресный.

По 1-м стихословии седален, глас 4:

Возсияли есте светло, яко звезды небесныя,/
деянии и учении вашими, светоноснии
новомученицы,/ и облистали есте землю
Белорусскую.

Слава, и ныне, Богородичен:

Пречистей руце Твои, Дево Мати,
простерши,/ покрый уповающия на Тя и Сыну
Твоему зовущия:/ всем подаждь, Христе, велию
милость.

По 2-м стихословии седален, глас 5:

Апостольским вещанием огласивше ваш ум,/
жертву чисту принесосте Царю и Творцу,/
воплощшемуся нас ради от Девы Богородицы и
воскресшему со славою,/ Егоже пред мучители
исповедасте, священномученицы.

Слава, и ныне, Богородичен:

Имуще Тя Заступницу, Пречистая,/
николиже убоимся враг на ны возстания,/ но,
яко Бога рождши Милостиваго, покрый ны
милостию Твоею,/ к Твоему бо заступлению
присно прибегаем.

Величание:

Величаем вас,/ святии новомученицы и исповедницы земли нашея,/ и чтим честная страдания ваша,/ яже за Христа во утверждение веры Православныя/ претерпели есте.

Псалом избранный: Услышите сия, вси языцы,/ внушите, вси живущии по вселенней.

По полиелеи седален, глас 1:

Церковь Православную, яко стражи неусыпнии, охраняете присно/ и верныя ограждаете, новомученицы божественнии, Христови воины.

Слава, и ныне, Богородичен:

Воистину Богородицу Тя ведем,/ яко Заступницу земли Белорусския и Молитвенницу присную о священницех ея,/ Ты бо сущих в бедах, гонениях и узах покровом божественным всемогуще хранила еси.

Степенна, 1-й антифон 4-го гласа. Прокимен, глас 7: Честна пред Господом/ смерть преподобных Его. Стих: Что воздам Господеву о всех, яже воздаде ми. Всякое дыхание: Евангелие от Луки, зачало 67.

По 50-м псалме стихира, глас 6: Исповедницы веры: писана на литии.

Канон Богородицы молебный, глас 8 и новомучеником, глас 4:

Песнь 1

*Ирмос: Моря чермную пучину/ невлажными
стопами/ древний пешешествовав Израиль,/ крестообразныма Моисеовыма рукама/ Амаликову силу в пустыни победил есть.*

Закон Божий зело возлюбив, отче Владимире,/ добре слепым детем его преподад еси,/ укрепляя в них дух смирения и бодрости./ Помози и нам претерпети вся напасти мира сего.

Истины веры Православная возвещая учеником вертограда духовнаго,/ сам, яко знамя победное, пронесл еси я чрез житие твое, священномучениче Василие.

Прием священный сан в годину тяжких испытаний,/ последи же, крепость во искушении явив,/ смерть от гонителей претерпел еси, отче Петре, священномучениче.

Богородичен: Богомати Пречистая,/ милостива сотвори нам Сына Твоего,/ из Тебе неизреченно воплотившагося на спасение наше,/ Тя бо Предстательницу и Спасение стяжахом.

Песнь 3

Ирмос: Веселится о Тебе Церковь Твоя, Христе, зовущи:/ Ты моя крепость, Господи,/ и прибежище, и утверждение.

В вере укрепляя паству твою, отче Валериане,/ заповеди Христовы соблюл еси даже до смерти.

Небоязненно стал еси на защиту веры Православная, священне Владимире,/ и, не устранившись сильных мира сего,/ исповедал еси истину Божию даже до крове.

Искренне служа Богу, священномучениче Иоанне,/ веру истинную соблюл еси,/ неповинно прием смерть от нечестивых.

Богородичен: Песньми похвальными воспоим, вернии, Пресвятую Владычицу,/ Марию Богоневестную, Покров Божественный,/ тихое Пристанище, всех верных Предстательницу.

Седален, глас 3:

Божественную благодать, немощная врачующи и оскудевающая восполняющи, приемше,/ яко агнцы чистии, Христу Пастыреначальнику последовали есте, мученицы всехвальнии,/ и, страдания мужественне претерпевше, венцы Небесныя стяжали есте./

Темже любовью святую память вашу светло торжествуем.

Слава, и ныне, Богородичен:

Не имамы инаго прибежища, разве Тебе, Богородице,/ страны наша Заступнице усердная,/ всяк бо, почитая Тя, надежду обретает.

Песнь 4

Ирмос: Вознесена Тя видевши Церковь на Кресте,/ Солнце Праведное,/ ста в чине своем,/ достойно взывающи:/ слава силе Твоей, Господи.

Неленостно Господеви служа,/ ревностно окормлял еси паству твою, отче Сергие,/ темже мученически за Христа пострадал еси.

Видя врага злохитростнаго, на Церковь Христову ополчившагося,/ ревностне призывал еси паству твою хранить благочестие и веру Православную, отче Владимире./ Сего ради в Небесных чертозах ныне упокоеваеши.

В субботу преблагословенную Христу спострадал еси, священномучениче Михаиле,/ избиение от иудея незаконнаго невинно претерпев./ Ныне же в Царствии Небесном с воскресшим Господом присно субботаствуеши.

Богородичен: Умерщвлена древле Адама, Пречистая,/ паки возвела еси к жизни,/ Ипостасную Жизнь рождши, Христа,/ Ему же

приразившись, расторжесе яве враждебнейшая смерть.

Песнь 5

Ирмос: Ты, Господи, мой Свет,/ в мир пришел еси,/ Свет Святый, обраща́й из мрачна неведения/ верою воспевающия Тя.

Пастырю Доброму последуя,/ положил еси душу твою за овцы словесныя, отче Порфирие./ Темже моли о нас Господа славы,/ да твердо сохраним веру Православную во вся дни жизни нашея.

Диаконскаго чина удостоився, отче Николае,/ первомученику архидиакону Стефану уподобился еси, власти безбожныя обличая,/ и, якоже той, смерть за Христа приял еси.

Богу и ближним неленостно послужил еси, отче Михаиле,/ сего ради беззаконными убиваемъ,/ с молитвою на устех дух твой Христу предал еси./ Ныне с праведными на лоне Авраамли почиваеши.

Богородичен: Яко утро, Богомати, возсияла еси,/ Истинное Солнце Правды, Христа Бога нашего, на рукуносящи,/ тем Тя вси прославляем.

Песнь 6

*Ирмос: Пожру Ти со гласом хваления,
Господи,/ Церковь вопиет Ти,/ от бесовския
крове очищися/ ради милости от ребр Твоих/
истекшею Кровию.*

Дерзновенно пред мучители веру во Христа
Иисуса, яко истиннаго Бога, исповедав,/ Того
ради даже до смерти пострадал еси,
священномучениче Николае.

Пастырское служение в Слуцких пределах
добре совершая/ и ревностию по Бозе
распаяся,/ верныя небоязненно исповедати
веру во Спасителя призывал еси/ и смерть
мужественне сретил еси, отче Иоанне.

Залог веры, якоже обещався, сохранил еси/
и мученическою смертью запечатлел еси,
священне Димитрие./ Сего ради земли
Белорусская и Тверская достойно тя величают.

Богородичен: Душ наших очищение/ и
спасения Ходатаица явилася еси, Пресвятая
Дево,/ темже Тя верою и любовью православно
величаем.

Кондак, глас 8:

Новомученицы и исповедницы земли
нашея,/ в тяжких испытаниих даже до смерти
любовь к Богу сохранивше,/ правило веры и
образ благочестия нам явили есте./ Сего ради,

ныне в Небесных обителях ликующе,/ молитесь
Христа Бога, да спасет души наша.

Песнь 7

*Ирмос: В пещи авраамстии отроцы
персидстей,/ любовью благочестия паче,
нежели пламенем, опаляеми, взываху:/
благословен еси в храме славы Твоея, Господи.*

В годину гонений окормлял еси люди
отчаянные,/ словом Божиим тыя укрепляя, отче
Иоанне./ Темже, яко пастырь истинный Церкви
Христовы,/ мученически пострадал еси.

Терпя страдания,/ не отрекся еси от веры
Христовой, отче Леониде,/ обаче даже до смерти
верен Господеви пребыл еси.

Милостив пастырь и усерден молитвенник
явился еси, отче Александре,/ сего ради и за
веру Христову убиение приял еси.

Богородичен: Моли присно Сына Твоего и
Бога нашего, Неискусобрачная Марие Чистая,/
низпослати нам велию милость.

Песнь 8

*Ирмос: Руце распростер, Даниил/ львов
зияния в рове затче;/ огненную же силу
угасиша,/ добродетелию препоясавшися,
благочестия рачители отроцы, взывающе:/
благословите, вся дела Господня, Господа.*

Доблемудренне паству твою окормляя,
священномучениче Владимире,/ совесть чисту и
неврежденну соблюл еси/ и смерть от
безбожных, Бога прославляя, приял еси.

От житий святых житию богоугодному
научаяся, отче Димитрие,/ якоже оныя, и
смерть за Христа претерпел еси.

Егда гонения на Церковь святую
умножишася,/ сан священный со дерзновением
приял еси, отче Петре,/ темже и в жертву
благоприятну Богу приносился еси.

Богородичен: Безсеменно зачала еси,
Богоневесто, Спаса и Господа,/ избавляющего
от тли воистинну песнословящия Тя.

Песнь 9

*Ирмос: Камень нерукосечный/ от несекомья
горы, Тебе, Дево,/ краеугольный отсечеся,
Христос,/ совокупивый разстоящая
естества./ Тем, веселящеся, Тя, Богородице,
величаем.*

Первый писатель житий пастырей земли
Белорусския,/ в годину гонения пострадавших,
явился еси, отче Серафиме,/ и послежде сам
живот твой за веру и други твоя положил еси.

Издетстка нищету и лишения претерпевая,
отче Матфее,/ милосердию и состраданию
навыкл еси./ Темже, на высоту священства

восшед,/ ревностно послужил еси приходящим к тебе/ и мученического венца сподобился еси.

Новомученицы и исповедницы земли Белорусския,/ молитесь о нас Святую Троицу,/ да и мы посреде искушений и бед/ сохраним веру Православную во вся дни живота нашего.

Богородичен: Бога, Егоже родила еси, Чистая Дево,/ Сего умоли рабом Твоим даровати покаяние/ и согрешений прощение.

Светилен:

Яко священномученицы и исповедницы вернии,/ явистесь в земли Белорусстей, пастырие добрии,/ и, испивше чашу страданий, благоугодите Христу./ Темже, во Свете ныне водворяющесе,/ молитесь с небесными силами о всех нас.

Слава, и ныне, Богородичен:

О Тебе хвалимся, Богородительнице,/ и к Богу имамы Тя теплую Предстательницу,/ прости Покров Твой святой/ и защити люди Твоя.

На хвалитех стихиры, глас 8:

Благодатию священства свыше облекшесе,/ пастырие добрии покажутся,/ и, кротость и терпение стяжавше,/ любовь ко Христу во страданиях сохранили есте;/ темже молим вас,

священномученицы земли нашея,/ испросите у Господа,/ да, тихое и безмолвное житие поживше/ во всяком благочестии и чистоте,/ спасем души наша. *(Дважды).*

Имуще вы пастыри неусыпныя в молитвах,/ просим вас, страдальцы Христовы,/ утвердите единство Церкви нашея,/ угасите шатания языческая,/ испросите у Господа Вседержителя/ даровати земли нашей благоденствие,/ да, тихое и безмолвное житие поживше/ во всяком благочестии и чистоте,/ обрящем велию милость.

Чтуще вы, яко новомученицы земли Белорусския,/ усердно просим,/ испросите у Господа нам, в скорбех и печалех пребывающим,/ терпение добропобедное и любовь нелицемерную,/ да, тихое и безмолвное житие поживше/ во всяком благочестии и чистоте,/ спасем души наша.

Слава и ныне, глас тойже:

Владычице, прими молитвы раб Твоих/ и избави нас/ от всякия нужды и печали.

На Литургии

Блаженны от канона песни 3 и 6. Прокимен, глас 7: Честна пред Господом/ смерть преподобных Его. Стих: Что воздам Господеву о всех, яже воздаде ми? Апостол к Филипписиим,

зачало 246. Евангелие от Луки, зачало 77.
Причастен: Радуйтесь, праведнии о Господе:

Текст службы утвержден определением Священного Синода Русской Православной Церкви от 5-6 октября 2011 года (журнал №122).

